

開放文學 – 歷代筆記 – 夷堅甲志 卷第二

張夫人 張子能夫人鄭氏·美而豔·張為太常博士·鄭以疾殂·臨終與張訣曰·君必別娶·不復念我矣·張泣曰·何忍為此·鄭曰·人言那可憑·盍指天為誓·曰·吾苟負約·當化為闖·仍不得善終·鄭曰·我死當有變相可怖畏·宜置屍空室中·勿令一人守視·經日然後斂也·言之至再三·少焉氣絕·張不忍從·猶遣一老嫗設榻其旁至夜半·屍忽長歎·自揭面帛·蹶然而坐·俄起立·嫗懼以被蒙頭·覺其屍行步踉蹌·密窺之·呀然一夜又也·嫗既不可出·震栗喪膽·大聲叫號·家人穴壁觀之·盡呼直宿數卒·持杖環坐於戶外·夜叉行百匝乃止·復至寢所·舉被自覆而臥·久之·家人乃敢發戶入視·則依然故形矣·後三年·張為大司成·鄧洵仁右丞·欲嫁以女·張力辭·鄧公方有寵·取中旨令合婚·成禮之夕·賜真珠復帳·其直五十萬緡·然自是多鬱鬱不樂·嘗晝寢·見鄭氏自窗而下·罵曰·舊約如何·而忍負之·我幸有二女·縱無子·胡不買妾·必欲娶何也·禍將作矣·遽登榻以手拊其陰·張覺痛·疾呼家人至·無所睹·自是若闖然·卒蹈奇變·

宗立本小兒

宗立本·登州黃縣人·世世為行商·年長未有子·紹興戊寅盛夏·與妻販縑帛·抵濰州·將往昌樂·遇夜駕車於外·就宿一古廟·數僕擊柝持仗守衛·明旦·蓐食訖登塗·值小兒可六七歲·遮拜於前·語言猥利可喜·問其誰家人·自那處來·對曰·我昌邑縣公吏之子也·亡父姓名是王忠彥·與母氏俱化去·鞠養於他人·將帶到此·潛舍我而去·茲無所歸·必死於狼虎魑魅矣·立本拊之曰·肯從我乎·又再拜感泣·遂收而育之·命名曰神授·兒性質警敏·每覽讀文書·一過輒憶·又能把巨筆作一丈闊字·篆隸草不學而成·見名賢古帖墨跡·稍加摹臨·必曲盡其妙·立本蓋市井小民耳·遽棄舊業而攜此兒行游·使習路岐賤態·藉以自給·後二年之春·至濟南章丘·逢一胡僧·神貌·杰·指兒謂立本曰·爾在何處拾得來·立本瞠曰·吾妻實生之·奚乃輕妄發問·僧笑曰·是吾五台山五百小龍之一也·失之三歲矣·方尋訪見之爾·久留定探大禍·吾已密施法禁·彼亦無所復肆其虐·於是索水噴噴·立化為小朱蛇·盤旋於地·僧執淨瓶呼神授名·蛇即躍入其中·僧頂笠不告而去·立本夫婦思念·久而不忘·淮東鈴轄王易之·親睹厥異·

齊宜哥救母

江陰齊三妻歐氏·產乳多艱·幾於死乃得免·一子宜哥·年六歲·警悟解事·不忍母困苦·咨於老人·問何術可脫此厄·老人云·唯道家九天生神章·釋教佛頂心陀羅尼為上·即求二經·從一史道者學·持誦三日·悉能暗憶·於是每以清旦·各誦十過·焚香仰天·輪寫誠懇·凡越兩歲·紹熙元年·歐有孕·更無疾惱·至十月將就蓐·宜哥焚誦之次·見神人十輩·立侍於旁·異光照室·少焉生(以下原空一葉凡十八行行十八字)臥游到處總傷神·今集中亦無·

陳苗二守

陳·字中玉·鄭州人·文惠公諸孫也·政和中·為蔡州守·始視事·謁裴晉公廟·讀平淮西碑·乃段文昌所制者·怪而問邦人·曰·自韓文公碑刻石·後為李愬卒所訴·以為不述愬功·而專美晉公·憲宗詔文昌別撰·事已久矣·忿然不平·即日磨去舊碑·別謾能書者·寫韓文刻之·苗仲先者·字子野·通州人·為徐州守·徐舊有東坡黃樓碑·方崇寧黨禁時當毀·徐人惜之·置諸泗水淺中·政和末·禁稍弛·乃鉤出·復立之舊處·打碑者紛然·敲杵之聲不絕·樓與郡治相連·仲先惡其煩聒·令拽之深淵·遂不可復出·二事相反如此·朱新仲說·

繫報

承節郎懷景元·錢塘人·宣和初·於秀州多寶寺·為蔡攸置局應奉·性嗜繫·一卒善庖·將烹時·先以刀斷頸瀝血·雲味全而美·後患瘰癧·首大不可舉·行必引首·既久蔓延不已·膚肉腐爛·首墜而死·宛若受刃之狀·景元自是不敢食繫·

玉津三道士

大觀中·宿州士人錢君·兄弟游上庠·方春月待試·因休暇出遊玉津園·遇道士三輩來揖談·眉宇修聳·語論清婉可聽·頃之辭去·曰·某有少名醞·欲飲二公·日雲莫矣·明日正午·復會於茲·尚可款·稍緩恐相失·錢許諾·獨小道士笑曰·公若愆期·可掘地覓我·皆以為戲·大笑而別·翌日·錢以他故滯留·至晚方抵所會處·則肴核狼藉·不復見人·悵然久之·弟曰·得非仙乎·試假畚鍤鑿地·才尺許·得石函·啟之·乃三道士象·冠巾儼然·如昨所見者·外有方書言鍛水銀為白金事·弟曰·兄取其書·弟願得道象·歸奉香火·兄欣然許之·既試·弟中選·兄復歸宿·驗其方·無一不酬·不數年·買田數萬畝·為富人居·一日坐廡下·外報三道士來謁·既見·一人起致詞曰·昔年玉津之會·君憶之否·君得吾仙方·不以賑恤貧乏·而貪冒無厭·祿過其分·天命折君算·今日即自改·尚延三歲·如其不然·旦暮死矣·吾以泄天機謫為人·當來主之矣·既去·錢君始大悔·即焚方毀灶·闔質戶不復啟·明日·小道士復至·未及坐·聞侍妾免乳·亟入視之·生一男·出陪客無所見·問諸僕隸皆莫知·錢不三年而殂·

陸氏負約

衢州人鄭某·幼曠達能文·娶會稽陸氏女·亦姿媚明爽·伉儷綢繆·鄭嘗於枕席間語陸氏曰·吾二人相歡至矣·如我不幸死·汝無復嫁·汝死我亦如之·對曰·要當百年偕老·何不祥如是·凡十年·生二男女·而鄭生疾病·對父母復申言之·陸氏但俯首悲泣·鄭竟死·未數月而媒約來·陸氏與相周旋·舅姑責之·不聽·才釋服·盡攜其資·適蘇州曾工曹·成婚才七日·曾生奉漕檄·考試它郡·行信宿·陸氏晚步廳屏間·有急足拜於庭·稱鄭官人有書·命婢取之·外題示陸氏三字·筆札宛然前夫手澤也·急足已不見·啟緘讀之·其辭雲·十年結髮夫妻·一生祭祀之主·朝連暮以同歡·俸有餘而共聚·忽大幻以長往·慕何人而輟許·遺棄我之田疇·移資財而別戶·不恤我之有子·不念我之有父·義不足以為人婦·慈不足以為人母·吾已訴諸上蒼·行理對乎幽府·陸氏歎恨·不意三日而亡·其書為鄭從弟甸所得·嘗出示胡儵然·

張彥澤遁甲

紹興四年·李參政少愚回為江西帥·遣總管楊惟忠討賊·以四月壬申日寅時·出師鄱陽·胡儵然送之渡江·回謂道友陳生·有道士張彥澤者·洛陽人·頃事徐神翁·多居西山好道之家·偶來會語·問何人選日時·儵然曰·穆茂才也·彥澤曰·何其繆邪·幸而非寅時則可·若然·賊雖自擒·主將將不利·以正午卜之·苟無大雨則善·時天色清霽·已有微暑·三人食已·散步僧舍·俄陰雲四合·雨下如注·溝壑皆盈·彥澤拊掌曰·必寅時也·楊公其危哉·時賊眾萬二千·官軍才三之二·先鋒將傅選悉五軍旗幟·行以壯軍聲·賊謀知之·曰·先鋒尚如此·若全師而來·何可當也·遂遣使迎降·次日·楊公所乘青驄馬忽斃·楊亦得疾·即反豫章·翌日而卒·

謝與權醫

楊惟忠·病時面發赤如火·群醫不能療·子婿陳樵憂之·以問胡儵然·有蘄人謝與權·世為儒醫·儵然引之視疾·既入·不診·曰·證候已可見·楊公夫人滕氏·令與眾議藥餌·朱張二醫曰·已下正陽丹·白澤圓·加鐘乳附子矣·謝曰·此伏暑證也·宜用大黃黃藥等物·因疏一方·議不合·時楊公年六十餘·新納妾嬖甚·夫人意其以是得疾·不用謝言·謝退謂儵然曰·公往聽諸人所議·才及門·眾極口詆謝曰·此乃千金中一治暑方·用藥七品·渠只記其五·乃欲療貴人疾邪·儵然以告謝·謝曰·五藥本以治暑·慮其太過·故加二物制之·今楊公病深矣·當專聽五物之為·不容複製·若果服前兩藥·明日午當躁渴·未時必死·吾來助諸公哭弔也·儵然語陳樵·樵不敢泄·明日楊卒·皆如謝言·四事皆胡儵然說·

趙表之子報

趙令衿、字表之。宣和五年。赴南康司錄。過贛州。游五祖山。冒風雨獨履絕頂。至白蓮池亭。憩磐石上。若夢寐間。見一老僧倚杖而言。曰。公此去廬阜無苦。但至晉州。當有哭子之戚。以昔守晉州。因事係民母。遂失所生子。今報也。言訖不見。表之審非夢所。又思慮未嘗及。而晉在河東。意他時當官於彼。歸為家人說。嗟異之。自祖山至黃梅縣。翌日。以雨不行。幼子善郎。忽感疾。縣令吳宇至。偶言邑之因革。曰。唐時嘗為南晉州。鮮有知者。表之驚歎。知僧言有證。疑其子必不久。乃許祝發為浮屠。越四日。竟死於白湖驛。去邑才三十餘里。表之親記其事。

神告方

建昌人黃襲雲。有鄉人為賈。泊舟潯陽。月下彷彿見二人對語。曰。昨夕金山修供甚盛。吾往赴之。飲食皆血腥。不可近。吾怒庖者不謹。漬其手鼎中。今已潰爛矣。其一曰。彼固有罪。責之亦太過。曰。吾比悔之。顧無所及。其一曰。何難之有。吾有藥可治。但搗生大黃。調以美醋。傅瘡上。非唯愈痛。亦且滅癩。茲方甚良。第無由使聞之耳。賈人適欲之。聞其語。意冥冥之中。假手以告。後詣寺詢之。乃是夜設水陸。庖人揮刀誤傷指。血落食中。恍惚之際。手若為人所掣入鑊內。痛楚徹骨。號呼欲死。賈人依神言療之。兩日而愈。

詩謎

元祐間。士大夫好事者。取達官姓名為詩謎。如雪天晴色見虹霓。千里江山遇帝畿。天子手中朝白玉。秀才不肯著麻衣。謂韓公絳。馮公京。王公圭。曾公佈也。又取古人名而傳以今事。如人人皆戴子瞻帽。君實新來轉一官。門狀送還王介甫。潞公身上不曾寒。謂仲長統。司馬遷。謝安石。溫彥博也。

武承規

武承規。字子正。長安人。政和七年。監台州寧海縣縣渚鎮酒稅。好延道流。日食於門者常數輩。家君時為主簿。戒之曰。吾。官卑俸薄。而冗食若此。何以給邪。曰。吾無美酒大肉與之。但隨緣而已。遇有酒則醉。有海魚則一飽。他無所費。其無能者旬日自去。安知吾不遇至人哉。他日復勸之不聽。一日氣貌洋洋。若有得色。曰。公笑有接道人。近有授我內交法者。每日子午時。運虎龍氣相摩。移時美暢。不減房室之樂。而無所損。雖未可度世。亦安樂奇術也。家君曰。公妻甚少。又未有子。奈何。曰。亦得一術仿此者授之。渠亦自得其樂。舍弟多男。兄弟之子猶子也。夫人有後足矣。家君欲聞其略。曰。公方效官。又有父母妻子。與承規異。六十歲以後。儻再相遇。是時方可。旬日復來。曰。承規欲往閩中訪先生。旦夕遣妻孥歸侍下。才有可配。即嫁之。其父揆時為越州將領。家君曰。既托身於公。何忍如此。已絕欲事。異室而居可也。何必遣。曰。畢竟為累。無此人則吾身輕。要行則行矣。曰。胡不一歸與親別。曰。骨肉之情。見面必留。卒未可脫。及再見。曰。妻已行矣。承規替期已及。官課皆不虧。而代者未至。願為白州郡。遭牙校交界。如其言。郡吏方至。其室虛矣。

崔祖武